

S O L  
SUPER HORIZONTE  
PRAGENO PRIMUM  
CONSPICUUS,

SEU

Festivus partim in Urbem, partim in Ec-  
clesiam Metropolitanam Pragensem  
ingressus

REVERENDISSIMI ET CELSISSIMI  
PRINCIPIS DOMINI DOMINI

I O A N N I S  
J O S E P H I

è COMITIBUS de BREÜNER,  
ARCHI-EPISCOPI PRAGENSIS,

LEGATI NATI,

SACRI ROMANI IMPERII PRINCIPIS, REGNI  
BOHEMIÆ PRIMATIS,

*Universitatis Carolo-Ferdinandæ Pragensis Amplissimi,  
Perpetuæque Cancellarij, &c.*

Die qVintâ, & seXtâ noVeMbrIs,

pIIs VotIs totIVs reglæ trIVrbIs,


VeLVtI genVINs heLIotropIIs,

IVbar IpsIVs sVbseqVentIbVs.

Pragæ, Typis Universitatis Carolo-Ferdinandæ in Collegio Societatis JESU  
ad S. Clementem.

1635





## RELATIO.

**V**ereri Poëtarum commento Phæbus terras irradiaturus, equis, effedo, habensque aureis instructus fuisse fingebatur, quò & nos Solis super horizontem Pragenum consurgentis equetrem apparatus, quadrigas, carpentaque aurea cum veritate referre possemus. Eâ enim Urbis parte, quâ Australes Solis excipit radios Populus Pragenus, exceptit venerabundus jubar Solis Joannæ; dum ex antiquissima Ducum adhuc Bohemiæ Arce Wissehrad nuncupata, tota humanior, atque nobilior Pragâ Phœbo suo obviam foras ad S. Pancratium egressa, dromedariam ejus atque præviâ egit Auroram. Hôc porior atque angustior, quò numerosiori, quàm æthereus ille Titan instructa fuit solarium equorum comitivâ. Si enim dumtaxat Pyrois, Eous, Æthon, atque succensus Phlegon universus fulgidissimi Apollinis, Sumonenfi Vire teite, est equitatus, quantò illustriorem fuisse oportet irradiantis Pragam Solis hujus adventum, qui compluribus generosissimorum equorum atque equitum catervis Urbi accidit quàm frequentissimus atque numerosissimus, inter assiduos tubarum clangores, tympanorumque crepitus, atque vehementissimos æris Campani quâ quâ latè vastissima patet Praga lætissimos sonos festivissimosque fragores. Sed nè cupidum rei actæ animum atque oculum porro suspensum teneamus, brevem omnium epitomen daturi sumus.

Postquam bonis avibus, secundissimis nimirum Austriacis Alaudis, Marcomanniæque Aquilâ Hercinios superavit saltus Hospes diu desideratissimus, Archi-Præsul facerrimus, ac Princeps Celsissimus JOANNES JOSEPHUS; suæ quoque Leo Bohemicus, nè deesset vigilantia, Vigilantissimo ac supremo gregis Domini in hac Archi-Diœcesi Pastori, ocellum ac pupillam Regum Bohemiæ Metropolim Pragam aperuit, panditque. Jámq; novæ Urbis mœnia subingressus, Castiôque præterventus Wissehradeno longo platearum ambitu forum contingit bubulum seu Boarium, & ecce stant limine currus,

nec ultrà ire sinunt: adeò difficile est in primo (a) Pragæ limine non offendere. An fors ut Phæbus ille noster Apollinem agat (b) Nomium, in foro Boario armentarium? Pastoralis id quidem muneris foret; at quid amplius suspicor: coram Senatûs-Consulto sistitur. Quin inò omnes Patres conscripti Populûsque Neo-Pragenus supplices ac venerabundi exorientem novum Solem cum vocali Memnonis statua similibus votis, Achivo illi χείρας ἤλιε non dissonis salvere ac bene venire jubent.

## SALUTATIO SENATUS NEO-PRAGENSIS.

**P**Auci, quos æquus amavit Jupiter, eò felicitatis proveci sunt, ut vixdum nati jam Legati, vixdum cives jam Primates, vixdum incorporati, jana Universitatum Amplissimi perpetuæque Cancellarij, vixdum advenæ jam Archi-Præfules nuncuparentur, ac in veritate existerent. Nempe conjurati respiciunt tua merita Divi, Princeps Celsissime; dum, quod Sacra Cæsarea Regiæque Majestas, Augustissimus ac Invictissimus LEOPOLDUS Dominus Dominus Clementissimus ratum denominando habuit, id Vaticanum Romæ Capitolium candidissimo SS. INNOCENTII XII. Pontificis Maximi calculo confirmavit stabilivitq;. Ut non vagæ ac instabilis Fortunæ Tua felicitas videretur, quàm inòbilis ac firmissima Ecclesiæ Petra sustentat. Illud duntaxat novum Neo-Prageno Senatûs-Consulto ac populo hujus Urbis universo videtur: Te Advenam Celsissimum, cum Praga petenda esset, Neapolim appulisse. Videlicet hæc Regia Nova Civitas, quid Pelasgo sermone indigitat aliud, quàm Czechicam (c) Neapolim? ut vel exinde feliciter nobis augurari liceat, Tibi etiamnum per Neapolitanum hoc territorium negotia Romana esse; ut qui jam Epomide Archi-Episcopali condecoratus es, Galero quoque Cardinalitio quondam Eminentissimus doneris. Gaudeant, per me licet, suo Archi-Antistite in Francia Remenses, jactent se suo cum Legato Nato in Hispania Toletani; in Te, una Praga utrumque veneratur. Quin & tertium voti instar subneçit, ut novus Eldras in Templo DEI novo prosperrimè vivas, facerrimè gubernes, largissimamque cum Adalberto super viridem spei nostræ montem benedictionem effundas. Dixi.

Sub id verò temporis, cum similia disertissimus Orator facundiâ suâ depromeret; curiosiori quispiam indulgens genio, talaria indutus Mercurij, totamque festivi ingressûs seriem prætergressus, hanc jocundissimam æquè, atq; acceptissimam omnibus, universi apparatus Prageni exhibuit epitomen.

RELA-

(a) Praga incolis Praha sic dicta à Bohemico Práh quod limen significat. (b) Sic dictus à pascendo grege. (c) Neapolis Græcè, Latine Nova Civitas.

# RELATIO PROCESSUS EQUESTRIS ET RHEDARUM.

**P**rimò locò procedebat Equestris Compagnia Micro-Pragensis, quam præcedebant Primò complures Equi Manuales præclare phalerati. Secundò, Chorus quatuor Tubicinum campestrium cum Tympanista. Tertio. Quatuor D. Capiteum in equis præcedentes, armigeri eleganter vestiti. Quarto. Sequebantur quadraginta lineæ Equitum, quarum singulæ quinque continebant viros, cæruleis baltheis exornatos, & evaginato enses in manibus gestantes. Quintò. Singulos linearum quaterniones interpolabant varij Officiales militares. Sextò, Agmen claudabant equifones, & currus aliquot annonarij.

Secundò locò procedebat Equestris Compagnia Neo-Pragensis, compluribus itidem equis manualibus, uno Tubicinum Choro, & D. Capiteo cum quatuor equestribus armigeris instructa; quæ numerabat quadraginta duas lineas equitum, Officialibus Militaribus interpolatas; & in singulis lineis quinque viri colobiati, Carabinas erectas manu gerebant. Agmen claudabant equifones, & currus annonarij.

Tertio locò procedebat Equestris Compagnia Vetero-Pragensis, multis equis manualibus, uno choro Tubicinum, armigeris D. Capiteum præcedentibus, quinquaginta tribus lineis Equitum, in pileis plumas, in manibus pistoletas gestantium conspicua, cum subsequis equifonibus; & curribus annonarijs.

Pedestres autem Campagnæ Civicæ, in cujuslibet Civitatis foro stantes, transeunti Reverendissimo ac Celsissimo Principi arma sua obsequiosè præsentabant.

Post Turmas Equestris sequebatur longa series triginta duarum Rhedarum, in quibus diversi sedebant Prælati partim Ecclesiastici, partim Regulares. Trigesimam secundam, quæ erat Celsissimi Principis, non minus pretiosam quàm elegantem insederunt duo Reverendissimi & respectivè Illustrissimi Domini Prælati Sanctæ Ecclesiæ Metropolitanæ, Præpositus, & Decanus.

In trigesima tertia (quæ erat Illustrissimi & Excellentissimi Domini Supremi Burggravij) visebatur Celsissimus ac Reverendissimus Archi-Præsul benedicens effusum in fora & plateas Triurbis populum; è regione sederunt duo Primarij Locumtenentes Regij, Illustrissimus & Excellentissimus D. D. Adolphus Wratislaus S. R. I. Comes de Sternberg (titulus) Supremus Regni Burggravius, & Illustrissimus ac Excellentissimus D. D. Joannes Franciscus  
S. R.

S. R. I. Comes de Wr̄bna (titulus) Supremus Regni Præfectus. Hanc Rhedam præcedebant multi ex nobilitate Equites, Aula Celsissimi Principis, & quatuor Reverendissimi Domini Archidiaconi equitantes cum D. Cærimonario Crucem Archi-Episcopalem præferente.

Sequebantur complures Rhedæ Regionum Locumtenentium, & diversorum D. D. Comitum ac Baronum.

Jamque plerique omnes, oculorum atque curiositatis vento vel facientes tabellam hanc legerunt avidè; admirari quædam, quibusdam magnitudinis ergò vix adhibere fidem, illi suspicere plurima, hi illud ante omnia facere maximi, ( ut vetustius loquar ) *inter tam multum ornati, tam parùm tumul- ti* extitisse.

Inde progressus Sol fulgidissimus. Meditullium Pragæ, veluti meridiem subintrat; dum per spaciota Urbis compita tandem forum adusque Verero-Pragenum, illum purpuratum Martyrum sanguinem Lithostrorum effuso suo aureo defertur. Hic suo Divino Apollini Musæ, Artes, atque Scientiæ omnes Celeberrimæ Carolo-Ferdinandæ Universitatis venerabundæ accidunt, debitumque præstant tanto Hospiti homagium. Ipsèque Magnificus Universitatis Rector in hæc vota disertus abit.

## SALUTATIO RECTORIS MAGNIFICI.

**P**rogredere Princeps Celsissime! *jam non novus Incola terre*, quia Urbem Vererem subivisti. Stat ad cancellos tuos antiquissima Universitas Carolo-Ferdinanda, seque tanquam suo Amplissimo Perpetuòque Cancellario submississimè inclinat, quem in corde hucusque circumtulit, nunc felicissimo auspicio oculis intuetur. In novum Orbem per Novam Urbem ingressus, quid vidisti? JOANNES, dum mundum intuetur, quid videt? *Tria sunt* ( inquit Ep. 2. ) *in Mundo: Concupiscentia carnis, concupiscentia oculorum, & superbia vite.* In foro Boario an non concupiscentia carnis spectabilis, veluti Victori ad pedes procidua, palmam porrexit? in perennis triumpho de concupiscentia carnis indicium. Triumpho porrò Princeps C. lissime etiam in hoc foro Urbis Veteris. Est nova causa triumpho! Sed quid video in hoc Almæ Universitatis apparatu? anne Academici sunt illi, de quibus Mat. 23. *Dilatant Phylasteria sua & magnificant simbrias, amant primos recubitus incensis, & primas catbedras in Synagogis, & salutatio- nes in foro, & vocari ab hominibus Rabbi?* Nolim cogites Princeps Celsissime Te in hoc mundo novo jam offendisse in superbiam vite. Non est, crede

non est, hisce tecta palliolis vitæ superbia; purpurascens verecundiæ est color iste, non livescentis superbiæ. Domus Sapientiæ sublimibus licet alta columnis non admittit in contubernium elatam superbiam. *Scientia inflat*, sed inania capita, non veram sapientiam. Theologia, omnibus omnia facit Theologos, tam humilis est. Jurisprudencia nihil arrogat sibi, tribuit cuique quod suum est. Dat Galenus opes, sed humili & ad infima se demittenti Medico. Quid Philosophia? humilis est cæterarum scientiarum ancillula. *Ea Princeps Celsissime*, iterum triumphas cum devotissima Tibi Universitate. *Carolo-Ferdinandea de vitæ superbia*. Quot purpuras vides in victoriosis humeris sapientum, tot spolia relata existima de proculcata vitæ superbia. *Universitas Pragensis unius cum Carolo IV. Archi-Episcopalis colloquij filia est*, Tu filiæ hujus Pater es. *Universitas inclyti Regni Boemiæ oculus est*, Tu oculi hujus Pupilla es. *Universitas annulus est*, desponsans virtuti sapientiam; Tu annuli hujus Gemma es. *Universitas pectus bene ordinatæ Reipublicæ est*: Tu pectoris hujus JOANNES & Cancellarius es. *Universitas cor & anima universi est*; tu cordis & animæ vita es. Te amante, Te animante vivemus. *Universitas denique thesaurus est*, Tu hujus thesauri Thesaurarius es; ubi thesaurus Tuus, ibi & sit cor Tuum. *Amplissimum Tibi cor est*, in illo deinceps Tuorum corda fidelium conquiescent. *Cor Tuum non absimile pharetræ dixerim*; tot enim sagittas emittis, quot benevolentia & beneficentia gratias in clientes Tuos dispergis. *Nemo nostrum jam est sine amico amovis vulnere*. Inexhausta est pharetra Tna. Intende porrò arcum, stringe nervum, dirige sagittam, nos affectuum Tuorum meta erimus & scopus. *Crede Princeps Celsissime, quemcunque beneficentia Tuæ amabili celo tetigeris, à scopo non aberrabis*. Tange me, & nigrum tetigisti. Dixi.

Ità prope Teynensem Basilicam Celeberrimam Universitatem, Amplissimus Senatus atque Respublica Veteris Urbis ante suam Curiam consequitur, officiosèque suum Delphicum veneratur Apollinem. Ea enim Delphos inter atque Urbem Veterem est affinitas, ut quemadmodum Delphi medio gaudent terrarum situ, ità quoque pervetusta atque Antiquissima Urbs hæc, medio utramque inter Regiopolim situ gloriatur. Nè quis verò Delphos in orbe medios demiretur, rationem mediij illius in orbe situs ex Mythologo audiatur Comite Natali, qui Jovem medium telluris punctum periclitari volentem, duas ejusdem pernicitatis sumpsisse aquilas refert, quæ festinâ alarum Æoliâ, totum sphaeræ terrestris ambitum emensa Delphis sibi obviam tandem constitierunt, indè ex fabula erutum veritatis argumentum est, Delphos medium terrarum situm obtinere. Nostrâ parùm refert, Delphos in orbis medio, an extremo siti dicantur; illud tamen est in confesso Celsissimum Apollinem

linem Delphicum JOANNEM JOSEPHUM in medio Regiæ Triurbis, sum-  
mâ omnium aggratulatione consistere. Quâ mediij usus opportunitate Ora-  
or jam veteranus Urbis Veteris in similem prorupit eloquentiæ svadam.

## SALUTATIO SENATUS VETERO- PRAGENI.

**M**edium Te tenemus Beati, subsiste; in medio enim Tripolis hujus es  
Virtus nostra Archi-Antistes Reverendissime, Princeps Celsissime.  
Urbe Veteri consistis, Neapolim inter atque (a) Petrinum montem  
mediâ, ut vel exinde liqueat, Te Româ ex Vaticana Petri Basilica cum pote-  
state Archi-Pastorali advenisse. Novum dicerem hominem, Legatum quip-  
pe cum hac digonitate Natum, nisi inclyta Vetus Urbs hæc mallet dicere Pri-  
matem Regni Veteranum. Magnus etenim Presbyter es, Grajis idem, quod  
Veteranus & Princeps. Et sanè nil in Te novum veneramur, omne enim,  
quod in Te Dignitatis Apostolica æquè, atque Cæsarea Romanâ Potestas con-  
tulit, plurimis jam retrolapsis Solibus adultissima atque provectissima Virtus  
Tua sibi vendicavit. Non tu temporis sed cum tardigrado Saturno tempus  
obsequio suo & Tibi defuisse videtur. Me Ædepol si perspicacior quispiam,  
Astronomorum oculus in horoscopum Tuum Princeps Celsissime aciem suam  
intendisset, vidisset sanè, ac natus eras, Archi-Antistitem nostrum; sed de  
genibus venerabunda Vetus Urbs nostra in Tua Reverendissima Celsitudine,  
Hospitem recognoscit Veteranum. At si hospitem, quomodo Veteranum?  
da gratiam verbo, sacrationem Larem, id est Hospitem domesticum, dicere,  
debui; ex quo enim tempore interiorum ædium nostrarum, præcordiorum  
nempe foculi & aræ calere desiderio Tui cæperunt, ex tunc jam Honori atq;  
Venerationi Tuæ in eis sacrificabatur; ita ut hæ animatæ ædes nostræ cum  
veritate Urbe Veteri consistere dici non possint, nisi simul Te Veteranum La-  
rem inibi cultum fuisse sit in confesso. Neq; tamen ita pro Te pertinax sto O-  
rator, ut reliquarum Urbium esse negem.

*Smyrna, Rhodus, Colophon, Salamis, Chios, Argos, Athena.*

Septenæ nobilissimæ Urbes pro patria olim Homeri decertasse feruntur; ego  
cum Patribus conscriptis, Populôque Veteris Urbis universo ita veneror me-  
um, ut tamen non negem alienum. Illud unum, quod pro aris focisque no-  
stris bene felicitérque eveniat, Te Celsissime Princeps quàm diutissime salvum  
atque incolumem, semper eundem, semper veterem, semper nostrum voveo  
præcorque. Dixi.

Dixit

(a) Mons Petrinus incolis dicebatur, ubi nunc Arx Regia sita est. (b) Ἰεροπόλις Græcè,  
Latine Veteranus & Princeps.



Dixit Orator, benedixit Archi-Præful. Et Sole sidereo jam in occasum vergente, accelleravit & ipse in suam Solis regiam iter suum. Jamque illi Carolinæ Magnificentiæ, ac Moldavenis triumphalibus arcubus, Ponti inquam Pragenfi Evropæorum faciliè principi appropinquabat. Ubi ex Cæsareo Regioque Collegio Academico, propè ducenti Societatis JESU Religiosi in plateam egressi, unum illius latus ante Basilicam Salvatoris, longissimo ordine occupabant; in altero autem latere numerosissimi, tum ex Convictu S. Bartholomæi, tum ex Seminario S. Wenceslai, cum suis Regentibus ac Præsidibus stabant Alumni tam Ecclesiastici, quàm Seculares, & benignissimum suum Solem in transitu, profundissimâ devenerati sunt inclinatione, applaudentibus per integrum bihorlum ex illa Magnifica & Propylæum Basilicæ Collegialis exornante Pergula, compluribus fidium, tubarum ac tympanorum choris. Cùm ecce tibi Moldavenæ Sîrenes Milesios imitatæ licitatores, cum Cois piscatoribus seu coëunte aspectantium turba, certâ mercede de uno retium jactu paciscuntur. Mittitur in Moldavam Sagena, & Milesiâ forte & fortunâ aureus ex undis tripus (pretiosus sanè piscis) protrahitur. Mox amicæ exoriuntur lites, atque in quovis aspectantium nimia tripodis potiundi succenditur cupido. Pythium æquitatis consulitur oraculum, hoc discretiori inspectâ Diphtherâ, Pythij adinstar quondam responsi: *detur sapientissimo, decedit.* Nôn hîc Milesius quærebatur Thales, aut Prienensis investigabatur Bias summæ tunc Sapientiæ in orbe candidati, sed candidissimo omnium calculo ac voto sapientissimo Apollini, Advenæ Celsissimo, hic aureus tripus adjudicatur. Tripus inquam, seu tergemina Triurbs Pragenâ ab oraculis deinceps ejus tota futura. Quid enim foret aliud Tripus hîc Moldavenus quantumvis aureus, nisi Mysticum æs, aut cymbalum tinniens, sinè sapientissimo Archi-Antistitis Divini *Spiritu*, qui tunc Ponti innitens Prageno, *serebatur super aquas.*

Jamque Micropolitana adventabat Curia Apollo noster Delphicus; & quod dudum suis fovebat in cordibus, præcordiisque clausum gessit, Senatus Populusque Urbicus Oratore suo indice palàm fecit,



# SALUTATIO SENATUS MICRO- PRAGENI.

*CELSISSIME PRINCEPS ARCHI-EPI-  
SCOPE REVERENDISSINE DOMINE DOMINE  
TER GRATIOSE .*

**I**ngredere tandem Urbem hanc Residentialem. Non quidem per stratas  
aurò vias, sed per triumphales pectoris nostri arcus, quos tibi struit obser-  
vantissima tui pietas, reverentissimus tui amor. JOANNES es, Legatus  
Natus, gratiâ plenus, in medio ovium tuarum Pastor vigilantissimus. JO-  
SEPHUS es, non Ægyptij illius Regis Pharaonis gratiâ, sed Augustissimi Cæ-  
saris ac Regis nostri LEOPOLDI Primi Clementiâ in Primatem Regni evehctus.  
Cerne JOSEPHE adstantes Manipulos undecim, Senatûs hujus Regiæ Urbis  
Minoris Pragenfis; qui nomine sui, & totius obsequiosæ Communitatis se se  
cum submissa reverentia inclinant, cordetenus voventes: Reverendissime,  
ac Celsissime Princeps, ut DEUS in adjutorium tuum semper intendat, & in  
benedictione ejus longas videas annorum series, omnéque, quod benedictio  
nutu tuo benedixeris, benedictum sit. Benedictus enim es, qui venis in no-  
mine Domini. Dixi.

His bene, feliciterque actis Hospes Celsissimus, Phœbûsque Horizontis  
Pragenfi fulgidissimus, sub opacæ noctis primordia jubar quoque suum tanti-  
per recondidit, & apparatus sibi magnificè Phyloxenium, placidissimus terq;  
exoptatissimus Hospes, inter festiva pyrij pulveris fulgetra atque fragores  
subintravit.

---

## DIES SOLIS DOMINICUS,

SEU

Ecclesiasticus Reverendissimi atque Celsissimi  
Archi-Episcopi JOANNIS JOSEPHI (titulus) in Metro-  
politana Divi Martyris Viti Ecclesiam  
ingressus.

**P**ostero verò Sideris JOANNÆI atque JOSEPHINI ortu, aurora micare  
serenior, dies illucescere clarior cœpit, quando die Solis proprio, die,  
nempe Dominico sacrationi pompâ Ecclesiam Metropolitanam illustra-  
tus processit. Isthoc

Isthoc excitæ jubare genuinæ Sacerrimi Cleri Archi-Diæcesani Aquilæ, ad Solem suum ac manè ortus est perniciosissimè advolaverunt; atque ut auspiciatissimis avibus hic Sol Metropolitanus proveheretur, devotissimo æquè atque prolixissimo numerosissimi Cleri comitatu, tot bene præfagientibus alicibus, quot præcedentibus Sacratibus capitibus in regiam supremi Tonantis ac Numinis deduxerunt. Hic illud usurpare liceat Poëtæ Fasti; 1.

*Vestibus intactis Tarpejas itur ad arces,  
Et populus festo concolor ipse suo est.  
Jamque novi præeunt fascēs, nova purpura fulget,  
Et nova conspicuum pondera sentit ebur.  
Flamma nitore suo templorum verberat aurum,  
Et tremulum summâ spargit in aede iubar.*

Sic nempe honorabitur, quemcunque voluerit Rex Cœli honorare. Esther 6.v.9. Sed ut pio legentiū desiderio faciamus satis, hunc ipsum Sacratorem è Palatio Archi-Episcopali ad Metropolitanam Ecclesiam progressum oculis subjicimus.

## Progressus Cleri Reverendissimum ac Celsissimum Principem JOANNEM JOSEPHUM (titulus) ad Metropolitanam Divi Viti Basilicam deductis.

Præcesserunt duo Reverendi Domini Pragenses Curati, totius Sacri Agminis ductores. Sequebantur :

1. Crucigeri cum rubro Corde S. Cyriaci	- - - -	14.
2. Carmelitæ	- - - -	18.
3. Servitæ	- - - -	22.
4. Augustiniani	- - - -	26.
5. Paulani	- - - -	16.
6. Capucini	- - - -	38.
7. Franciscani Observantes	- - - -	72.
8. Augustiniani Eremitæ	- - - -	34.
9. Minoritæ	- - - -	28.
10. Dominicani	- - - -	50.
11. Canonici Præmonstratenses	- - - -	40.
12. Vexilliferi Bonifantes	- - - -	8.
13. Alumni ex Seminario Archi-Episcopali, Clerici quidem linteati, Sacerdotes verò in pluvialibus	- - - -	30.
		14.

14.	Alumni ex Pontificio & Cæsareo Convictu S. Bartholomæi, Clerici in linteis, Sacerdotes in pluvialibus	40.
15.	Decani, Parochi, & Vicarij Foranei	36.
16.	Regulares diversorum Abbatum Cæremoniarij in pluvialibus	16.
17.	Duo Chori Tubicinum	
18.	Aula Celsissimi Archi. Præfulis, quam comitabantur immixti Cæsarei Judices, Primates, Doctores Juris ac Medicinæ, & diversi Cæsarei Regijque Officiales.	
19.	Consistoriales.	
20.	Vicarij & Altaristæ Ecclesiæ Metropolitanæ	14.
21.	Infulati Prælati, Abbates, Præpositi	17.
22.	Choralistæ Antiphonas decantantes	8.
23.	Infulati Prælati & Canonici S. Ecclesiæ Metropolitanæ	6.
24.	Reverendissimus ac Celsissimus Princeps Archi. Episcopus, sub Baldacchino, à 4. primarijs Parochis Pragensibus gestato; utrumque latus stipabant duo in Dalmaticis infulati Canonici Metropolitaniani.	

Dúmque hoc pacto sub Phrygiæ acús sumptuoso opere, serico auróque prædivite Baldachino Sol noster, Phœben suam illustraturus procedit Ecclesiam, mox à vestigijs ejus primæ magnitudinis Illustrissimæ atque Excellentissimæ Regni Procerum ac Regionum Locumtenentium in Cælo Boëmico Stellæ: secundæ dein, atque tertiæ Magnitudinis ex copiosissima Nobilitate Sidera, cum triumphali arcu Consularis Zodiaci, immensaque minorum astrorum se se in comitivam diffundentium viâ lacteâ, eum prosequuntur.

*Panditur interea Domus Omnipotentis Olympi;*

Ad cujus limina, Templi nimirum Metropolitaniani Sancta Sanctorum ductus Princeps Celsissimus ac Phœbus Illustrissimus; tincturus veluti frigidis undis radios suos, nè nimio fulgore intuentium perstringeret oculos, aquâ sese evlogâ, cunctósque circumstantes lustrat, Reverendissimo lympham suppeditante aquario Præposito Metropolitaniano, atque ut eò largioribus gratiarum porrò roraret imbribus, densâ thuris succensâ nube Sol hîc obducitur, eâdem Reverendissimâ atque Illustrissimâ thurificante dexterâ, assiduos inter buccinarum clangores, tympanorúmque gratos boatus, organorum denique omnium, ærisque Campani sonoros continuósque applausus.

Provehitur porrò navi Templi, atq; ad liliati roséique Regis Divi Wenceslai Sacrarium, securum veluti portum appellit, eum adoraturus DEU M, cujus Rex hîc potentissimus æquè ac sanctissimus vinicolam, frumentarium, pîsto rémque in terris egit Eucharisticum.

Inde progrediens ad aram Templi summam velut ad auge[m] Sol, proster-  
nitur coram ara omnipotentis Olympi, eò demissior quò Sacerdos est major,  
eò profundiori latriæ cultu, quà solium celsius est conscensurus.

Et verò tempus jam erat, quo, favente ità & disponente Augustissimo  
Imperatore, Serenissimoque Bohemiæ Rege; annuente & confirmante Summo  
Ecclesiæ capite, atque in æternitatis scrutinio præordinante ità Numine, so-  
lium conscenderet Principale, ac Sedis Sux Archi Episcopalis throno tandem  
consideret JOANNES JOSEPHUS Sol noster ac Phœbus fulgentissimus, Ar-  
chi-Episcopus.

Inde perlecto per anagnosten Brevi Apostolico, felix augurium cœpit, se nõ  
brevibus perennaturum annis, neque calamitosi hujus maris, quo hinc inde  
procellosè ferimur brevia unquam & sirtes experturum.

Atque ità Sole Solium suum jam occupante, ac velut in felicitatis auge,  
meridiantè, exurrexit Luminare minus, Reverendissimus ac Illustrissimus Præ-  
positus ejusdem Ecclesiæ DD. Joannes Ignatius Dlauhowesky de Longavilla,  
(titulus) Episcopus Milevitanus, & Suffraganeus Pragensis; atque TRIA  
VERBA (in quibus nempe continerentur omnia) DE ORTU, PROGRESSU  
& INFLUXU Solis JOANNÆI ac JOSEPHINI pro facerrimis Rostris Roma-  
nâ Eloquentiâ edisseruit. Quæ jam tunc typis vulgata, sub finem hujus Re-  
lationis, studioso Lectori relegenda annectimus.

Sed nè verbosus tantum in Solem suum esset amor Metropolitanorum,  
ad manus usque procedit; dum Reverendissimi, Illustrissimi, Perillustres,  
Amplissimi, Venerabiles, Admodum Reverendi, Eximij respectivè Prælati,  
Canonici, Vicarij, Decani, atq; Parochi Sacratissimam Celsissimi Archi Præ-  
sulis dexteram reverentissimo affectu bäsian, disvaviântque. Utq; nihil be-  
nignitatis beneficentissimæ Archi-Antistitis dextræ deesset, assurgente non-  
nihil, atque Hymnos Divinos decantante suâ Celsitudine, tandem brachium  
in largissimam levatur, ac protenditur benedictionem.

Quam sanctissimam benedictionem Dicto excipit Ecclesiastica duo-  
rum ex Capitulo Metropolitanò Canonicorum, Boëmo idiomate altera pro  
exedra Templi, altera Tevtonicâ Dialecto in atrio Ecclesiæ declamata, reliquis  
Capitularibus penès Solem suum ad cornu Epistolæ remanentibus, & stalla-  
sua ad cornu Evangelij, Reverendissimis DD. Abbatibus, utpotè Hospitibus,  
cedentibus.

Et quid mirum esse possit, omnia fieri vocalia præsentè Solè? cùm ipsa  
inanimata Memnonis statua ad præsentiam sui Phœbi in verba prorumperet  
& salutationes, atque ipsa adèò etiam durissima Babylonis Saxa, teste Pausaniâ  
in Attriciis, harmoniam redderent non inconcinnam, in quibus deposita quan-  
doque Apollinis chelys ferebatur.

Jámque Sacri Oratores verba ad populum facere desierant, cùm ecce Eucharisticum ad aras litæ Sacrificium Reverendissimus ac Perillustri Dominus Wenceslaus Bilek à Bilenberg (titulus) Decanus Capituli ac Officialis, tot ad pompam infulatis Adstitibus, quot præsentibus Capitularibus æquè, atque Regularibus Pralatis. Ad Missam solennem Archi-Episcopales ministrabant Alumni; Thronum Celsissimi Archi-Præfulis ambiebant Pontificij ac Cæsarei.

Quo ritè peracto tremendo atque incruento Holocautomate, Eucharisticus quoque occinitur Ambrosij hymnus: Te DEUM laudamus.

Tandem DEO Divisque omnibus ità religiosè cultis, ac Cælo universo Archi-Antistiti Celsissimo ac Reverendissimo bene favente atque propitio, penates repetit proprios Sol JOANNÆUS, ab aris Templi ad focos domesticos remeans grandi cum comitatu.

Atque hæc sunt, quorum pium ac benevolum Lectorem, de Sole super Horizonte Prageno primùm conspicuo certiozem facere voluimus; non omnia minuta prosequentes, nè culicem colasse videremur. Quantumvis de numerosissimis pedestris militiæ cohortibus totius Regiæ Triurbis, nec non Hraczanènsi in fructissima Panoplia, religiosis familijs ante domicilia sua Solem venientem adorantibus populoque alio effusissimo atque pene innumero affatim disserere potuissemus. Quod si quis totum hunc apparatusum, uno veluti oculorum intuitu perspicere aver, ad periti sculptoris ætupon remittimus.

## OCTAVA SOLIS DIES,

*Seu*

## PALLII ARCHI-EPISCOPALIS

Traditio.

Octavâ post Dominicam Inthronizationis die, atque adeò mox sequenti Dominicâ quæ post Pentecostem erat vigesima quinta, dies verò Mensis Novembris decima tertia,

*REVERENDISSIMUS, AC CELSISSIMUS*

**P R I N C E P S,**

**Tanquam Primas Regni, & ARCHI-EPISCO-  
PUS Pragensis,**

In sua Capella Archi-Episcopali,  
de manibus

*Reve-*

*Reverendissimi, & Illustrissimi Domini, Domini,*

# JAROSLAI,

SACRI ROMANI IMPERII COMITIS à STERN-  
BERG, DEI ET APOSTOLICÆ SEDIS  
GRATIA

EPISCOPI LITOMERICENSIS, &c. &c.

*Tanquam ejusdem Sanctæ Sedis ad hunc Actum*

DEPUTATI COMMISSARIJ,

Sumptum de Corpore S. Petri, & à Successore Petri San-  
ctissimo Domino Nostro

## INNOCENTIO XII.

missum recepit

### PALLIUM ARCHI-EPISCOPALE

& in eo plenitudinem Potestatis, ritu sequen-  
ti:

**E**X Decanali, propè Metropolitanam D. Viti Basilicam, sita Residentia., Magnificè Celsissimi Archi-Præfulis Curru, Aulâq; Archi-Episcopali cõ-  
mitante, devectus est ad Palatium Archi-Episcopale Reverendissimus ac  
Illustrissimus Sedis Apostolicæ Commissarius, & ab occurrente Humanissimo  
Principe salutatus, & deductus ad Archi-Episcopale Sacellum, in quo olim  
sub Rudolpho II, à Zbinkone Berka Archi-Episcopo Pragensi, & Litomislensi,  
cæterisque Præpositis, Abbatibus & Prælatis Regni, celebrata fuit Synodus  
Pragensis.

Illic in eodem oblongo Oratorio, tapete rubrò holosericeò magnificè  
exornatò, ambo genuflexi Antistites, sacras tantisper fudère preces. Rema-  
nente autem ad idem Oratorium Celsissimo Archi-Præfulè, Illustrissimus Com-  
missarius Pontificius præparatum sibi ad cornu Evangelij, propè ipsum Altare,  
Faldistorium Baldacchino instructum accessit; & sumptis ibidem Pontifica-  
libus pro Missa celebranda apparamentis, eam legit. Peractâ autem Celebran-

tis Communionem, D. Cærimoniaris Atchi-Episcopalis *PALLIUM*, argenteæ phialæ impositum, & velò sericeò coopertum, reposuit supra medium Altaris,

Peraçtò Missæ Sacrificiò Illustrissimus Sedis Apostolicæ Commissarius, indutus amictu, stolâ, pluviali, & mitrâ confedit ante Altare super Faldistorio, excepturus Juramentum Fidelitatis, nomine Sedis Apostolicæ, à Celsissimo Archi-Præsule; qui omnibus Pontificalibus parametis, ac si celebraturus esset, exceptâ Infuiâ, & Chirothecis demptis, indutus, & ante Pontificium Commissarium genuflexus, recitavit clarâ voce formam Juramenti per literas Apostolicas traditam.)

Juramentò præstitò surgens Illustrissimus Commissarius, acceptumque de Altari *PALLIUM*, & illud super humeros Celsissimi Principis adhuc ante se genuflexi imposuit, dicens: *Ad honorem Omnipotentis DEI, & Beate MARIÆ semper Virginis, ac Beatorum Apostolorum PETRI & PAULI, Domini nostri INNOCENTII Papæ XII. & Sanctæ Romanæ Ecclesiæ, nec non Ecclesiæ Metropolitanæ Pragensis Tibi commissa, tradimus Tibi Pallium de Corpore Beati Petri sumptum, in quo est plenitudo Pontificalis Officij, cum Archi-Episcopalis Nominis appellatione; ut utaris eò intra Ecclesiam tuam certis diebus, qui exprimentur in Privilegijs ab Apostolica Sede concessis. In Nomine Patris, & Filij, & Spiritûs Sancti. R. Amen.*

Post Pallij traditionem, Illustrissimus Sedis Apostolicæ Delegatus, detecto capite recessit ad cornu Evangelij. Celsissimus vetò Archi-Episcopus surgens cum Pallio, ascendit ante Altaris medium, & habens ante se Crucem suam, detecto capite, solenni formâ benedixit populum.

Datâ benedictione, & depositis in Sacello Pontificalibus parametis, dum unâ cum Illustrissimo Pontificio Commissario, ad superiora Palatij conclavia sese reciperet Celsissimus Archi-Præsul, suò jam conspicuus *PALLIO*; Reverendissimi Capitulares, Consistoriales, & reliqui de omni statu præsentem, inter lætissimas aggratulationes, & faustissimas apprecationes sub Protectionem consuebant *PALLII ARCHI-EPISCOPALIS*.

